

# Fwn Gvaq Luegbya Gingjsaek Gyaeu

Youq seizcin, miz ngoenz he banringzgvaq, raq fwncin ndeu doeksasa sat le, ndaw lueg ronghsien moqsak.

Ngamq doekfwn sat, gij yiengh ndaw lueg, hawj gou roxnyinh cwxcaih raixcaix. Ndaw hoengheiq seuqset mbaeqmbet haenx, sanqfat ok heiq-namh rangfwdfwd, couh lumj gij gahfeih ngamq cawj ndaej nei, gij heiqhom de riengz laeng diemheiq sup haeuj ndaw ndang bae, youh get youh swnh, sawj gou maez youq ndawde fizfwdfwd.

Gou ngiengx gyaeuj ngonz mbwn, vengq mbwn osumsum ndeu cik haeuj lwgda daeuj, baenz geu baenz geu fwjhau youq byonghmbwn fouzfedfed, fwj mbangmbengmbeng, yinzsisi bu dwk: Miz mbangj lumj benq sujqasane mbaeumbengmbeng, miz mbangj lumj gij faenjajcang gwnz naj lwgsau nei mbangmbingmbing, lij miz mbangj couh lumj gaiq couzhau ndeu bingz-cupcup.....

Gou laebdaeb coh baihnaj byaij

bae, sawqmwh yawjraen ndaw caznywj miz benq “vanae” he ronghsag, byaij gyawj sijsaeq yawj, yienzlaiz dwg nyoemq vahndoi saekhau ndeu cingqcaih hai dwk hoenghhwd. Doek fwn gvaq, gij raizcaw gwnz mbawloeg sawdikdik, daengngoengz ronghmyigmyig. Dujva saekhau haenx di cungj mbouj uq, lumj vanae ityiengh cinghseuq, langhhai youq ndaw mbaw heuseuseu haenx, yienj ndaej sang-nengneng. Raq rumz he ci daeuj, gyoengqde youq ndaw rumz bibuengq ngauznged, fizfwdfwd yienjsouh gij rumzseuq liengzseuseu neix.

Mbouj rox seizlawz, mbouj rox gizlawz, sawqmwh yiengj ok sing roeg ndeu daeuj, sepsadsad gig ndeidingq. Sien dwg sing ndeu, caiq song sing, ciemhciemh yied daeuj yied lai, gwnz faex seiq hamq, ndaw byonghmbwn, sing roeg heuhciuciu mbouj dingz mbouj duenh. Gyoengq roeg mwngz ciengq coenz gou eu coenz, gyoebyaem ndeiriri, gapbaenz raq fwen habciengq ndeu.



Gwnz mbawfaex go faexhung haenx venj rim raemxcaw sawdikdik, bibuengq yaek doek, youq laj baihndit, ronghcingcing lumj rinbauj ityiengh. Nditndat con gvaq geh mbawfaex, raizraiz vava set roengz gwnz diegnywj, seiqhamq caemrwgrwg, doxhuz doxnde.

Doek fwn gvaq le, mbwn' o,

fwjhau, byaheu, faexloeg, nywjheu, vabieg, roeqiq.....Caen lumj mbaw veh raemxmaeg ngamq veh baenz ndeu, gou daengx ndang seizneix cungj cimq youq mbaw veh neix sim fizfaengfaeng.

(Gvanj Yijdungz / raiz  
Yinj Fuzgen /hoiz)



## Saek Cou Ranzhag

Baez rumz fiufiu mbin gvaq, baetbeuj geij mbaw faex henj, lumjbaenz naeuz hawj raeuz: “Seizcou daengz lo!” Saek cou ranzhag couh lumj fuk doz gyaundeit ityiengh, engq dawz gij yiengh gyaeu daegsaek de okdaeuj.

Youq ndaw fuk doz neix, mbaw faex loenq lumjbaenz caengz damj unq, beiq youq gwnz dieg ndoq. Gij yiengh hoengz unq raeujfwdfwd, lumjbaenz naeuz hawj vunz de dwg yiengh sengmingh feiz labcuk, de yienznaeuz myox, hoeng de geng ak, couh lumj gij mbaw faex loenq nei, bienqbaenz bwnh seizcin dwk va.

Seizcou ndaw ranzhag, mak baenz laidaih. Youq gwnz loh suenva baihlaeng, heiq mak homfwdfwd gig nyex vunz maij. Moix baez gou gvaq suenva baihlaeng, cungj nyaenx mbouj ndaej laep da, sup baez heiq naek ndeu, lumj nyi miz sing go ndei youq henz rwz, gij heiq mak homfwdfwd couhdwg soundaej, hixdwg maqmuengh.

Seizcou ndaw ranzhag, cix-dwg go faexcoengz sangrad. Mwh gaiqlai faex cungj ngaiz rumzcou nyoeignyamx, cijmiz go faex-

coengz daengj maenh mbouj ning, vanzlij aemq mbaw loeg gyaundeit lumj nyawh rim ndang mwncup. Couhcinj de ndangdaej mbouj maengh, hoeng de youq ndaw heiq nit seizcou, hix lumj boux vunzloet ityiengh, dang gou rub lumh gij mbaw soem lumj cim de seiz, hix ndaejdaengz ligliengh laidaih.

Seizcou ndaw ranzhag, baenzlawz ndaej lumz geij go faexgveiq ne? Gyoengqde yungh baenz nyoemq baenz nyoemq va' gveiq gyaundeit youh hom-fwtfwt daeuj sijveh gij henj gij fag seizcou, lij simdingh cwcwd sijveh gij saeh iqnyaeq seizcou. Seizcou dwg mbanjranz gyoengqde, gyoengqde engq dwg eiqsei seizsou.

Yienznaeuz seizcou deng beij guh mbaw loenq, siliengz caeuj doxbiek, hoeng ranzhag gij mbaw loenq, gij mak baenz, go faexcoengz sangrad caeuj go faexgveiq heiq hom vunz maij haenx, caemhcaez baijok seizcou gij daegsaek vunz maij.

Seizcou ndaw ranzhag, dwg gyaundeit, dwg fung fag, dwg engq ak, engq dwg sim' angq.

(Cwnz Gaijyauz/raiz  
Veiz Yen'gyangz/hoiz)

## Gij Dauhleix Gyaez

Hanzgyaj daengz lo, gou yaek hawj mehdaiq “doeksaet angq” baez ndeu — “Fwt ma daengz” ranz mehdaiq. Youq gwnz roen, gou lumj loq fangzhwnz nei ngeix mwh mehdaiq raen naj gou le gij yienghnaj doeksaet angqyangz de.

Ngoenz daihngaih, seiz daengz ranz mehdaiq, de cingq rwed va. Gou buet-bongh gvaqbae, got de: “Gou daeuj lo!” Mehdaiq sien ngawh yaep he, ciep dwk da hoengz raemxda conh lo, gou ganjnaeuz de gamjdoengh lai, byawz liuh daengz de dauq lumj laeq lwgnyez deng utheiq gwnvei nei nam dwk: “Guh gijmaz mbouj caeux di lwnh hawj gou naeuz yaek dauqma?” “Gou yienghneix guh mbouj dwg lau mwngz sien bwh yienghneix yienghhaenx, dwgrengz lai ma?” Gou got de engq ndaet naeuz. Mehdaiq gwnz naj saetmuengh liuxliux, “yienghneix fwt dauq ranz, mbouj ngamj, mbouj ngamj.....” De doq ngauz gyaeuj doq bak bongz naeuz, “sou caeux aen singgeiz ndeu lwnh hawj gou naeuz yaek dauqma, gou couh ndaej angqyangz aen singgeiz ndeu, sou caeux ndwen ndeu

lwnh hawj gou naeuz yaek dauqma, gou couh ndaej angqyangz ndwen ndeu gonq.....”

Dingqnyi mehdaiq baenzneix raemhgangj, gou cij roxnyinh, baez “fwt ma daengz” caemh mbouj hawj de doeksaet angq, dauq hawj de siengsim, ienqhoij caeuj nyapnyuk saek rim dungx gou, sawj gou hix riengz dwk miz di nanzgvaq. Yaep haenx, gou mbouj rox baenzlawz nai mehdaiq, ndaw sim naemj doiq mbouj gvaq mehdaiq, ndaw hoz lumj miz ndok gaz nei, hawj gou mbouj rox baenzlawz guh. Mehdaiq rox gou mbouj ndei eiqsei, riu naeuz: “Mbouj youqgaenj da! Gij saedceij gou ngoenzngoengz cungj bingzbingz ciengzciengz, ngoenzneix hix suenq miz doeksaet angq, dauq dwg mehdaiq damsim di, siengj caeux di rox sou dauqma, yienghneix gij saedceij miz feih miz muengh haenx couh lai raez di.” Dingqnyi doenghgi vah mehdaiq neix, gou loq gamjsouh daengz gij doggyax de, gou hainduj mingzbeig lo, gyaenz mehdaiq mbouj dwg gij doeksaet angq gou nyinhnaeuz haenx couh gaeuq lo. Ndaw sim naemj doiq mbouj gvaq mehdaiq lumj nyaij ndwnj makmoiz heu nei rim dungx rim uk cungj dwg soemj sot saep sat, soemj ndaej naj nyaueuq, saep ndaej haiz biq.

Seizde, mehdaiq raen gou najsaepp mbouj angq, ganjvaiq rag gou haeuj ranz, dawz ok mbabwt gou ceiqa haengj gwn. Couh yienghneix, gwn gvaq mbabwt vanswd, raen gvaq mehdaiq miz gangj miz riu, ndaw sim gij saetlaex doiq mbouj gvaq mehdaiq haenx cix menhmenh siu lo.

Baez ndaw sim fwt raen doiq mbouj gvaq mehdaiq neix, hawj gou rox lo, gyaenz mbouj dwg gag nyinhnaeuz ndiep bouxwnq, gyaenz dwg roxyiuj sim' eiqa doiqfueng!

(Youz Yijhanz / raiz  
Huz Bangjhangz / hoiz)

